

26. oktober 2000

UKA 2000/18

**Isertitanik akileraarutit pillugit Inatsisartut inatsisaata
allangortinneqarneranik Inatsisartut inatsisissaattut siunnersuut**

pillugu

siunnersuutip aappassaaneerpeqarnissaanut

Inatsisartut Akileraartarnermut Akitsuusiisarnermullu Ataatsimiititaliaata

ISUMALIUTISSIISSUTAA

Inatsisartut Akileraartarnermut Akitsuusiisarnermullu Ataatsimiititaliaat
suliarinninnermi ukuninnga inuttaqarpoq

Inatsisartuni ilaasortaq Per Berthelsen (S), siulittaasoq
Inatsisartuni ilaasortaq Lars Sørensen (IA)
Inatsisartuni ilaasortaq Hans Enoksen (S)
Inatsisartuni ilaasortaq Daniel Skifte (A)
Inatsisartuni ilaasortaq Mads Peter Grønvold (K)

Inatsisartut Akileraartarnermut Akitsuusiisarnermullu Ataatsimiititaliaata ulloq 6.
oktober 2000-imi ataatsimiinnermini isertitanit akileraarutit pillugit Inatsisartut
inatsisaata allangortinneqarneranik Inatsisartut inatsisissaattut siunnersuut suliaraa.

Siunnersuut pingasunik immikkoortortaqarpoq:

1. Soraarninngornissamut sillimmatissatut naafferartumik akiliutit
isertitanit akileraaruteqaataasussanit ilanngaatineqarsinnaaner
periarfissinneqassaaq.
2. Inuussutissarsiutitut ingerlatap ilaqutariit iluanni kinguaan
tunniunneqarnerani akileraarutitut tunngasut
kingornunneqarsinnaaner
ammaanneqassaaq.
3. Aalisariutini nammeneq tunisassiorfilinni, aalisariutini tulaassuisuni
aammalu kalittaatini il.il. Dansk Internationalt Skibsregisterimi
nalunaarsorsimasuni, nunattali imartaani angalasuni inuttaasut
isertitanit akileraarutit pillugit Inatsisartut inatsisaanni § 34 a-mi

oqilisaaffigineqarsinnaanermut malittarisassani
ilaatinneqarunnaassapput.

Inatsisartut 2000-imi upernaakkut ataatsimiinneranni aningaaserivinni ileqqaakkat akileraarutitigut oqilisaaffigineqarnissaat pillugu Inatsisartut inatsisissaattut siunnersuutip ataatsimiititaliamit suliarineqarneranut atatillugu ataatsimiititaliamit oqaatigineqarpoq inuiaqatigiinni ileqqaarsinnaaneq patajaallisarneqassasoq. Taama isumaqarneq soraarnerussutisiaqalernissamut ileqqaarnermut minnerunngitsumik tunngatinneqarpoq.

Taamaattumik soraarinngornissamut sillimmatissatut naafferartumik akiliutit isertitanit akileraaruteqaataasussanit, soraarnerussutisiaqarlernissamut aaqqissuussinerit ingerlaavartumik pisartagaqartitsisunut akileeqataassutit assigalugit, ilanngaatigineqarsinnaanerisa periarfissinneqarnera Akileraartarnermut Akitsuusiisarnermullu Ataatsimiititaliamit assut iluarisimaarneqarpoq.

Ataatsimiititaliap Naalakkersuisut isumaqatigai oqarmata soraarnerussutisiaqalernissamut aaqqissuussinerit taakku marluk imminnut tapertariissinnaassasut, taamaalillutik innuttaasut, namminneq ataasiakkaarlutik pisariaqartitaminnut naleqquttumik, soraarnerussutisiaqarlernissamut sipaakkamik aaqqissuunnissaannut siunissami periarfissaqarnerulissallutik.

Ataatsimiititaliap isumaqarpoq akileraarutitigut iluaqutissartaqartumik sipaakkat maanaannakkut unitsinneqarpata allanulluunniit tunniunneqarpata isertitanit akileraarummut taarsiullugu akiliutigineqartussa 45 %-iussasoq. Taamaaliornikkut soraarnerussutisiaqalernissamut aaqqissuussinerit akiliuteqartariarluni aaqqissuussinerit ilaajunnaarnikkut iluanaarniapiluttoqannginnissaa qulakkeerneqassaaq.

Ataatsimiititaliamit naatsorsuutigineqarpoq inatsisissatut siunnersuutip matuma akuersissutigineqareerneratigut Naalakkersuisut paasisitsiniaanermik sapinngisamik piaartumik aallartitsissasut, taamaaliornikkummi akileraarutitigut iluaqutissartaqartumik ileqqaariaatsit maannamit annertunerusumik ilisimaneqalissammata.

Inuussutissarsiutip ingerlatap ilaqtariit iluanni kinguaanut tunniunneqarnerani akileraarutinut tunngasut kingornunneqarsinnaanerisa ammaanneqarnerat ataatsimiititaliamit aamma assut iluarisimaarneqarpoq, taamaaliornikkummi pingaartumik savaateqarnermi kutterillu atorlugit aalisarnermi kinguaanut ingerlatassanngortitsisarneq oqilisaassiffigineqassammat. Kingornussinissamulli malittarisassat inuussutissarsiutinut taakkununga marluinnarnut atuutinngillat. Malittarisassat suliffeqarfinnut inuussutissarsiornermik ingerlataqartunut tamanut atuupput.

Kingornussinissamut malittarisassat kingunerissavaat kinguaariinni utoqqaanerusup ingerlatap kinguaanut inuusunnerusunut tunniunnerani nalikilliliinertigut pigileqqitanut akileraartinneqan-nginnissaa, tassami taamatut akileraarusiinissaaq

kinguartinneqassammat kinguaariinni inuusunnerusu naliliutinik
nalikillilernerqarsinnaatitaasunik piginnikkunnaarnissaata tungaanut.

Kiisalu ataatsimiititaliamit Naalackersuisut isumaqatigineqarput oqarmata Dansk
International Skibsregisterimut tunngatillugu ineriartornerup takutikkaa aalisariutini
nammineq tunisassiorfilinni, aalisariutini tulaassuisuni aammalu kalittaatini il.il.
Dansk Internationalt Skibsregisterimi nalunaarsorsimasuni, nunattali imartaani
angalasuni inuttaasut isertitanit akileraarutit pillugit Inatsisartut inatsisaanni § 34 a-
mi oqilisaaffigineqarsinnaanermut malittarisassani ilaatinneqarnissaat
tunngavissaaruttoq.

Matumuunga Akileraartarnermut Akitsuusiisarnermullu Ataatsimiititaliap
isumaqatigiittup inassutigaa isertitanit akileraarutit pillugit Inatsisartut inatsisaata
allanngortinneqarneranik Inatsisartut inatsisissaattut siunnersuut Inatsisartunit
akuersissutigineqassasoq.

Per Berthelsen

Hans Enoksen

Lars Sørensen

Daniel Skifte

Mads Peter Grønvold